

„Voda teče, nič ne reče“ Osnovna škola Behuadin Selimović

Rijeka - njen tok, most što obale spaja, prizor koji dušu odmara i očima prija.

U ovom projektu smo se bavili vodom, njenim značajem, njenim osobinama, sa različitih aspekata i iz različitih izvora.

Istraživali smo zastupljenost vode u živim organizmima, kojima je život bez nje nemoguć. Zanimalo nas je koliko vode ima u tijelu čovjeka, biljaka i životinja.

Istraživanja smo nastavili posjetom sarajevskom vodovodu gdje smo od ljubaznog osoblja saznali informacije o metodama ispitivanja higijenske ispravnosti vode, o ispitivanju teških metala u vodi koju pijemo i o vodopotencijalima naše države.

Posjetili smo i izvorište Bačevo gdje su učenici imali priliku da vide odakle se vrši snabdjevanje vodom naše škole i cijelog naselja.

U projektu su učestvovala brojna sekcija koje su organizovane u našoj školi, a prva od njih je, naravno, ekološka sekcija koja je tematikom vezana za ovu oblast. Izrađivali smo plakate koji sada krasi hodnike i holove škole, koristili fotografije i informacije koje nam trebaju biti stalni podsjetnik na važnost i značaj vode. Posjetili smo i časove Odjeljnjske zajednice, gdje su učenici svojim vršnjacima govorili o značaju i zaštiti vode, te o načinima racionalne potrošnje vode.

Voda je bila inspiracija i na časovima likovne kulture na kojima je urađen veliki broj radova koji sada krasi naše učionice.

Časovi geografske sekcije bili su posvećeni proučavanju voda BiH, sa posebnim akcentom na rijeke i riječni turizam.

Na časovima tehničke kulture učenici su također pokazali interesovanje za ovu temu, a jedan od njihovih radova je i maketa Starog mosta, simbola Mostara, a i cijele BiH.

Na građevinskoj sekciji učenici su pravili makete vodenice, bunara, poznatih svjetskih građevina, itd. Svi učenici koji su bili uključeni u projekat imali su zadatak da svoje vršnjake educiraju o načinima racionalnog korištenja vode.

Svi učenici koji su bili uključeni u projekat imali su zadatak da svoje vršnjake educiraju o načinima racionalnog korištenja vode.

Jedan od načina bio je i izrada promotivnih letaka koje su uradili članovi ekološke i informatičke sekcije.

Otkako je naša škola 2010. godine proglašena eko-školom, imamo i eko patrole. Eko patrole su imale zadatak da educiraju učenike na školskim odmorima o načinima štednje vode. Ukazivali su učenicima da ne puštaju vodu da teče bez potrebe, da zavrću slavine, jer ukoliko voda curi kap po kap u toku dana će isteći velika količina vode.

Iako je naša domovina poznata po prirodnim bogatstvima, posebno vodenim, moramo biti svjesni važnosti vode i educirati kako bismo ju zaštitili i sačuvali i za buduće generacije, jer snagu i važnost vode možemo vidjeti svuda oko nas. Voda je ta koja pobjeđuje nepopustljivu tvrdoću, to je onaj tihi pokret koji razara planine, koji razdvaja stijene.